


TEZAUUR LITURGIC
28 APRILIE

SLUJBA
SF. IERARH
CHIRIL,
EPISCOPUL
TUROVULUI



MINSK, 2005



Месяца априлиа в 28-й день СЛУЖБА

иже во святых отцу нашему Кириллу, епископу Туровскому

НА МАЛОЙ ВЕЧЕРНИ

На Господи возвах: стихиры, глас 8:

Отче наш Кирилле богомудре, / от юности
Божественному учению прилежал еси, / и плоды
достойны Христу Царю принесл еси, / Темже
преукрашен славы венцем // возшел еси в
небесныя обители.

Отче наш Кирилле преподобне, /
добродетельным монашеским житием Богу
угодил еси, / и якоже древняя подвижницы, на
столп возшед, затворился еси, // моляся Отцу
Небесному о спасении мира.

Отче наш святителю Кирилле, / послушания
ради благодать епископства восприял еси, /
паству Туровскую от бед и напастей добре
сохранил еси / и от раздоров Церковь Русскую
избавил еси // своими наставленьми и
поученьми.

Отче наш Кирилле богосветле, / благочестием
своим просиял еси, / и яко солнце правды
нечестия и язычества тьму отгнал еси, / и всю

страну нашу просветил еси, // научая златыми
словесы своими славити Троицу Единосущную.

Слава, глас тойже:

Освященный Божественным Духом, / яко
чистый сосуд духовнаго мира, благоухание
источавши всем верным, / прехвальне
святителю наш Кирилле, / земли Белорусския
славо и украшение, // моли о всех, любовию
чтущих память твою.

И ныне, праздника.

На стиховне стихиры, глас 2.

Подобен: Доме Евфрафов:

Явился еси / земли Туровския отрасль благая, /
и сосуд освящен, Кирилле, / и жилище //
Пресвятаго Духа.

Стих: Священницы Твои облекутся в правду, / и
преподобнии Твои возрадуются.

Радуйся, святителей похвало, / отче Кирилле, /
священников слава, / правило монахов, //
Церкве Русския утверждение.

Стих: Блажен муж, бойся Господа, / в
заповедех Его восхощет зело.

Приими пение ныне / чад твоих, отче, / и
любящим тя / подавай // сердечная прошения.

Слава, глас тойже:

Небеснаго Царя Престолу / со ангельскими чинми предстоя, отче Кирилле, // моли о чтущих и прославляющих тя.

И ныне, Богородичен:

Небеснаго Царя Мати, / Небеснаго Иерусалима жителей быти сподоби нас / и сладости таковыя получитьи, // еяже желает видети око ангельское.

Тропарь зри на велицей вечерни.

НА ВЕЛИЦЕЙ ВЕЧЕРНИ

На Господи воззвах: стихиры, глас 2:

Киими похвальными венцы / венчаем златословеснаго Кирилла? / Земли нашае чудное прозябение и добродетелей мног плод благословен, / чистоту жития возлюбльшаго и равноангельно пожившаго, / иноков наставника и благочестия ревнителя, / земнаго ангела, небеснаго человека, / егоже ради святых молитв / врагов Церкви Христос Бог низложи, // имеяй велию милость.

Киими песенными похвалами / прославим богомудраго отца нашего Кирилла? / Преподобным ликом сопричастника и столпником сожителя, / под святым покровом страстотерпцев благоверных князей Бориса и

Глеба / в монашеских подвизех просиявшего / и наставленьми своими братию умудрившего, / смирению и покаянию всех учившего, / егоже стезями ходити и нас, Христе Боже, направи, // по велицей Твоей милости.

Киими пророческими песньми / похвалим святителя преславнаго нашего Кирилла? / Архiereем быти Промыслом Божиим предызбраннаго, / и на кафедру Туровскую князем и людьми возведеннаго, / храм чудный в славу Святыя Троицы воздвигшаго, / ходатая непрестаннаго за паству свою пред Пречистою и Небесными чинми, / ихже ради молений граду нашему и всей стране // Господь дает велию милость.

Кия похвалы и дары духовныя / принесем златоустому учителю всея Руси Кириллу? / Он же ныне со Ангелы и со всеми святыми / за род христианский пред Престолом Божиим молится, / даровати стране нашей мир, / Церкви Православной утверждение и единомыслие, / архiereем истинное согласие, / влаstem благое вразумление, / воинству благочестие и на враги победу, / людем покаяние и страстей освобождение, / земли благоплодие // и душам нашим велия милости.

Слава, глас 8:

Явися днесь пресветлая память святителя
нашего Кирилла, / яко солнце над землею
Полесскою ярко сияющее / и благодати лучами
нас согревающее, / к ревности по Бозе зовущее
всех, // с верою и любовью пришедших на сие
светлое торжество.

И ныне, праздника.

Вход. Прокимен дне. И чтения 3 святительская.

На литии стихиры, глас 1:

Неувядаемым венцем венчался еси от руки
Вседержителя Бога, / святителю наш отче
Кирилле, / сего ради и мы имамы тебе, великаго
ходатая пред Господом, / Егоже усердно ныне
моли / подвигом добрым нам подвизатися // и
Веру Православную в чистоте соблюсти.
Святителю Кирилле, уста златосиянная, / ты
пречистое Всесвятаго Духа сокровище в земли
Русстей был еси, / отнюдуже возвеселил еси
спасительным твоим словом, / дерзновение убо
обрет к Богу, / в наслаждении горняго наследия
// молися о нас, отче священнейший.

Излияся благодать во устнах твоих, преподобне
отче, / и сего ради помаза тя Господь /
архиереем быти людем града великаго на

Припяти / и учити паству Туровскую
благочестию и правде. / Темже, препоясан
оружием Сильнаго, / пресекл еси языческое
нечестие, / и ныне не престай моляся //
умирити мир и спасти души наша.

Слава, глас 6:

Приидите вернии в храмы Божии, / там бо ныне
возносится слава / в вышних живущему
пастырю доброму и святителю Кириллу, /
совершающим же память его / той прошения во
всем исполняет, и от напастей и бед избавляет,
// и спасает своими молитвами.

И ныне, праздника.

На стиховне стихиры, глас 6.

Подобен: Тридневен:

Святителю богомудре Кирилле, / разумнаго
света заре, / церковное светило, святителей
похвало, / красото иноческаго жития и
истинное постников правило, / заступниче наш
пред Господом, // от козней вражиих нас
свобождай.

Стих: Уста праведнаго поучатся премудрости, /
и язык его возглаголет суд.

Святителю славне Кирилле, / наставниче
добродетелей, / града Турова отрасли
преславная, / прилежания в учении юным
образе, / грозный ересей обличителю, //

молитвою твоею и нас укрепляй.

Стих: Уста моя возглаголют премудрость, / и поучение сердца моего разум.

Святителю наш Кирилле, / солнца сияние праведное, / земли Белорусския хранителю, / властем и книжникам путю к Истине, / мира златоустый учителю, // словом своим к спасению нас направляй.

Слава, глас 2:

Тя, великаго архиерея и пастыря, / незлобива и преподобна, / покаяния проповедника, / слова Божия ритора златоустаго, / восхваляюще с любовью молимся: / подаждь нам немощным благодатное укрепление // и в житии духовное наставление.

И ныне, праздника.

По Ныне отпущаеши: тропарь святому дважды, и праздника единожды.

Тропарь, глас 4:

Благочестия ревнителю и рачителю, / иноков и столпников похвало, / святителю Туровския паствы преславне, / златословесный учителю, / светлым учением богоразумия своего просветивый концы русския, / в молитве к Богу благодатный грешников споспешниче, / Кирилле богомудре, моли Христа Бога /

утвердиться нам, соотечественником твоим, //
во Православии, благочестии и единомыслии.

НА УТРЕНИ

По 1-м стихословии седален, глас 4:

Приидите торжествуем светло, празднующе
память преподобнаго Кирилла, / святителя
земли Туровския, / сей пастырь добрый ныне
зрит доброту неизреченную обителей горних, /
тамо со апостолы и мученики ликуя и с
праведными собеседуя, / молится прилежно / о
чтущих верою память его.

Слава, и ныне, Богородичен, глас 5:

Стена непобедимая нам христианом еси,
Богородице Дево: / к Тебе бо прибегающе,
невредимы пребываем / и паки согрешающе,
имамы Тя молитвенницу. / Тем, благодаряще,
вопием Ти: / радуйся, Благодатная, Господь с
Тобою.

По 2-м стихословии седален, глас 5:

Воспоем вси златоустаго Кирилла, / почтим
заступника, и утверждение граду Турову / и
всёя Белорусския земли хранителя: / спасай нас,
блаженне отче, молитвами твоими.

Слава, и ныне, Богородичен, глас 5:
Богородицу Тя истинную прославляем, со
святым угодником Твоим Кириллом, яко
предвозвести нам отшествие того на покой, чрез
явление Купятицкого образа Твоего, / да чудо
сотвориши, и место славное его упокоения
открывши, моляще Сына Твоего спастися душам
нашим.

Полиелей и величание:

Величаем тя, / Туровский подвижнике и
святителю Кирилле, / златословесный
Российский учителю, / и чтем святую память
твою, / ты бо еси усердный пред Богом
предстателю за род наш / и теплый
молитвенниче о спасении душ наших.
Псалом избранный: Блажен муж бояйся Господа,
в заповедех Его восхощет зело.

По полиелей седален святого, глас 4:
От юности последовал еси Христу, отче наш
Кирилле, / столпников на земли Русстей
начальниче, архиереев удобрение, / благочестия
ревностный проповедниче, / стадо свое добре
научал еси молиться Господу. / Егоже и ныне
моли спасти всех, / любовью тя почитающих.

Слава, и ныне, Богородичен, глас 4:
Дево Всенепорочная, пресущественнаго Бога
рождшая, / Того со святителем нашим Кириллом
непрестанно моли / оставление прегрешений и
исправление жития дати нам прежде конца, /
верою и любовью поющим Тя по долгу, / едина
Всепетая.

Прокимен, глас 4: Уста моя возглаголют
премудрость, / и поучение сердца моего разум.
Стих: Услышите сия вси языцы, внушите вси
живущия по вселенней.

Евангелие от Иоанна, зачало 35.

По 50-м псалме стихира, глас 6:
Наста днесь великое торжество в крае нашем, /
прославляем бо златоустаго Кирилла, / многими
воистинну делы и словесы Богу послужи / ныне
же во обителях горних Христу предстоит / и
прилежно молится // о всех с любовью чтущих
память его.

Канон 1-й,
егоже краегранесие: Святителей и преподобных
украшение.

Творение Георгиево. Глас 6.

Песнь 1.

Ирмос: Сеченое сечется море Чермное, /
волнопитаемая же изсушается глубина / таяжде
купно безоружным бывши проходима, / и
всеоружным гроб, / песнь же богокрасная
воспеваешься: // славно прославися Христос Бог
наш.

Святой Троице: Слава Тебе, Боже наш, слава
Тебе.

Смысла Подателю Триипостасный Боже, / Ты
даждь нам разум и слово, / да, отверзше
недостойная уста, / воспоим святителя Кирилла,
/ Туровския земли пастыря и учителя / и всея
Руси светильника.

Припев: Святителю отче Кирилле, моли Бога о
нас.

Веселися ныне и радуйся, граде Турове, /
ничимже меньший ты еси в землях Белорусских,
/ но паче славою и честью возвеличенный /
изрядных угодников Божиих, / от нихже мы
святителя Кирилла / днесь благоговейно
прославляем.

Якоже ометы вменил еси богатство тленное / и
славу скорогибнущую, / избранниче Божий
Кирилле, / от юности явивый ума твоего
божественная устремления, / яже ко спасению,
/ во объятия Отча путь указующая.

Богородичен: Тихое Пристанище к Тебе
прибегающих, / Преблагословенная Владычице,
/ моли из Тебе воплощенного Христа Бога
нашего, / во еже бежати нам суеты мира сего, /
и во всяком месте и звании / Небеснаго
Царствия удостоитися.

Ин канон, глас 8,
егоже краегранесие, кроме Богородичнов:
Туровскаго Златоустаго пою.

Ирмос: Поим Господеви, проведшему люди Своя
сквозе Чермное море, яко Един славно
прославися.

Иисусу: Господи Иисусе Христе, Боже наш,
помилуй мя.

Туровскаго святителя Кирилла, земли нашея
великаго светильника, сподоби, Господи,
воспети ми недостойному.

Припев: Святителю отче Кирилле, моли Бога о
нас.

Устне имый нечистая, дерзаю восхвалити
архипастыря, явившаго чадом церковным
правило веры и образ смирения.

Река учений божественных явился еси,
святителю Кирилле, и напояеши присно мое
изсохшее сердце.

Богородичен: Голубице Пренепорочная, Мати Христа Бога, приведи мя жаждущаго к источнику жизни вечней.

Песнь 3

Ирмос: Господь Сый всех и Зиждитель Бог, / созданное, Безстрастный, обнищав, Себе соедини, / и Пасха, за яже хотяше умерети, / Сам Сый Себе предпожре, / ядите, вопия, Тело Мое // и верою утвердитесь.

Измлада прилежал еси, отче, / учению книжному, / и Божественным Писанием / свыше укрепляемь и просвещен, / пришел еси во обитель иноческую / поработати Господеви. Тело твое постом и бдением / сотворил еси приятелище Духа Святаго, / отче священнейший, / Кирилле богомудре, / иноком явился еси образ и правило, / паче всех труждаяся.

Еже не имать послушания ко игумену / и всей во Христе братии, / якоже обещася при пострижении, / таковый монах спасен быти не может, / взывал еси непрестанно, преподобнейший, / да не уловишия в бесовския сети.

Богородичен: Людие непокоривии и суемудреннии, / почто в похотениях своих коснеете? / Поревнуйте послушанию

Богоотроковицы, Яже Гавриилу рече: / Се раба
Господня. / И тако мысляще и деюще /
смирению нелицемерному навькноте.

ИѠ

Ирмос: Утверждей в начале небеса разумом и
землю на водах основавый, на камени мя,
Христе, заповедей Твоих утверди: яко несть
свят, паче Тебе, Едине Человеколюбче.

Оставив мира сего тленная, иго Христово на
рамо возложив, понесл еси труды сугубья, на
столпе в затворе теснем.

Воздержанием истинным и молитвою
непрестанною возшел еси на верх добродетелей,
подобно древним великим подвижником.

Столпника новаго тя вемы, отче наш Кирилле, и
лествичника предивнаго, наставника
благочестия.

Богородичен: Едину Благословенную, Пречистую
Владычицу, воспеваем вси вернии, яко
Одушевленное Небо и Престол Херувимский.

Кондак, глас 3.

Подобен: В Мирех, святе:

В Турове, святе, священнодействитель показался
еси, / Христово бо, отче Кирилле, Евангелие
исполнив, / положил еси душу твою о людех
твоих / и соблюл еси единство Церкви Русския.

/ Сего ради освятился еси, // яко великий таинник Божия благодати.

Икос:

Воспоим ныне святителя Кирилла песньми, /
Туровским людем пастыря и учителя, / и всея
Русския земли Златоуста, / да предстательством
его просветимся, / и Божественных словес его
поучением / отстанем всякия лести и суеты, /
поработаим неленостно Господеви / и явимся
чисти душами и телесы, / якоже и сей угодник
Христов / и великий таинник Божия благодати.

Седален, глас 4:

От юности взем крест твой, благочестиво Христу
последовал еси, увядив плотское мудрование
воздержанием. Темже на святительском
седалищи сед, возвеличил еси Владыку и Того
Пречистую Матерь, отче Кирилле богоблаженне.

Ин седален, глас 8.

Подобен: Премудрости:

Юже с высоты мудрость уведев и благодать
словес от Бога, / просиял еси на Руси яко
вторый Златоуст, / слово Божие неленостно
проповедал еси, / всякое беззаконие и леть
поправ словесы твоими. / Темже по Бозе
ревностию князя обличив, / и Феодорца

посрамил еси еретическое мудрование. /
Святителю Кирилле, моли Христа Бога /
прегрешений оставление даровати /
празднующим любовью святую память твою.

Слава, и ныне, Богородичен:

От Троицы Единого неизреченно заченши, Дево,
/ и чудно Сего родила еси паче слова и мысли, /
и общно Божественнаго естества устроила еси
человеческое естество, древле изгнанное. /
Темже, сошедшеся, Рождеством Твоим вси
спасшийся, Всенепорочная, / Твоим словесем
последующе, должно Тя ублажаем, / моляще
Христа Бога / прегрешений оставление
даровати / верою Тя славящим, Матерь Его.

Песнь 4

Ирмос: Провидев пророк / тайну Твою
неизреченную, Христе, провозгласи: / положил
еси твердую любовь крепости, Отче Щедрый, /
Единороднаго бо Сына, Благий, // очищение в
мир послал еси.

Евангельских словес учением / последуя, отче
Кирилле, избрал еси тесный путь / и тако
возшел еси на верх добродетелей, / на столпе
един затворився, / подвизаяся в посте и
богомыслии.

Избег суесловия и праздности, /
Божественными Писании ум свой просветил

еси, / и во священнем безмолвии / очистил еси от страстей душу, / яже всего мира вящше. Изволением Духа Святаго избираша вси людие / тя, отче Кирилле, во архипастыря Туровскаго, / ты же, неотступному молению их повинуюся, / за послушание сан восприял еси, / не ради себе, но ради славы Божия.

Богородичен: Престоле огненный, радуйся, / Невесто Невестная, Мати Пречистая, / Палато преукрашенная, / Кивоте святой, / Бога Невместимаго Вместилище.

Ин

Ирмос: Услышах, Господи, смотрения Твоего Таинство, разумех дела Твоя и прославих Твое Божество.

Кирилла богомудраго, Божественных Писаний рачителя, ко святительскому служению Великий Архиерей Христос призвал есть.

Аще и желал еси уклониться от славы земная, но обаче не возмогл еси презрети избрания Божия.

Глас твой, отче Кирилле, и до ныне слышен есть: не пренебрегайте, христиане, совершением Божественных Евхаристии.

Богородичен: Освященная Трапезо, на Нейже Хлеб сладкий испечется, Богородице Марие, помогай поющим Тя.

Песнь 5

Ирмос: Союзом любве связуеми, апостоли /
Владычествуящему всеми себе Христу
возложше, / красны ноги очищаху //
благовествуяюще всем мир.

Рачение о пастве своей имея, / ко спасению
выну всех наставляя еси, / словом и житием
быти / христианскаго звания достойны.

Единение духа в союзе мира / соблюдал еси, по
апостолю, богомудре, / и распри тлетворныя / и
лукавая разделения пресекал еси.

Проклят всяк, иже мыслит злая, / разделить
матерь нашу Церковь Русскую, / таковый есть
богоотступник, / дерзновенно провозгласил еси,
святителю Кирилле.

Богородичен: Отсекают сами себе от Церкви
Божия, / нечтуция православно Пречистую
Богородицу, / мы же вернии немолчно Ю
величаем, / Заступницу нашу усердную.

Ин

Ирмос: Утренююще вопием Ти: Господи, спаси
ны, Ты бо еси Бог наш, разве Тебе иного не
вемы.

Оглашаюся твоими словесы благодатными,
Туровский святителю, яже Церковь Русская, аки
бисер многоценный сохраняет.

Златословесный учителю, паче всех возсиявый

на Руси, отче наш Кирилле, предстательствуй за паству твою пред Господем.

Людей православных ходатай, апостолом подобник во благовестиях и бдениях, воистинну, отче, явился еси.

Богородичен: Родився от Девы, мир просветил еси, Христе Боже, и мене от прегрешений моих избави, яко Человеколюбец, и управи живот мой, молю Тя.

Песнь 6

Ирмос: Бездна последняя грехов обыде мя / и волнения не ктому терпя, / яко Иона Владыце вопию Ти: // от тли мя возведи.

Добраго Пастыря Христа стопам последуя, / взыскати овча погибшее пришедшаго, / святителю Кирилле, потщался еси, да никтоже в пастве твоей / от зловерия погибнет.

Орган Утешителя Духа истины быв, / наставил еси, отче, твоими писаними / сынов земли Русския / пресекати козни лукавнующих.

Боголюбскому князю Андрею / многая послания душеполезная написав, / явился еси, богодухновенный Кирилле, среди бурь житейских / путевождь ко спасению.

Богородичен: На небеса возвела еси естество человеческое, / в тине страстей иногда

лежавшее, / Препоблагословенная Мати и Дево, / Христа Бога рождшая.

ИҢ

Ирмос: Ризу мне подаждь светлу, одеяйся светом яко ризою, Многомилостиве Христе Боже наш. Аще и не имамы, грешнии, елея добрых дел, но молитвами святителя Кирилла, Светодавче, нас просвети.

Тме суеверия, отшедшей иногда от паствы твоея, не даждь ныне поглотити нас, отче Кирилле.

Оружием вооружився слова Божия, отгнал еси мглу бесовскую и посекал еси нечестивое еретическое терние.

Богородичен: Госпоже Пречистая, не остави мя во мраце гиблема, но умоли Сына Своего помиловати мя окаяннаго.

Кондак, глас 5:

Бодрствуя в молитвах, / послушания и благочестия добрый рачитель быв, / терпению и смирению научал еси паству свою, / добродетельми преподобия и правды стадо Христово озаряя, / и медоточными словесы всю землю Русскую питая, / на правый путь заповедей Господних силою духа твоего наставлял еси всех, / и ныне просвети, яко

солнце, люди омраченные грехами // и к покаянию нас приведи.

Икос:

Приидите днесь, людие, / похвалим своего святителя, глаголюще ему: / радуйся, Кирилле, святителю честный и учителю наш, другий Златоуст, / на Руси паче всех возсия, / святым и пресветлым учением твоим концы русския просветив! / Радуйся, яко солнце, омраченные и темныя Богоразумием просвещавши и умудрявши! / Молим ти ся, святителю, малое сие моление приносяще: / моли о нас Вседержителя, / Емуже ныне предстоиши со дерзновением, / от належащих бед, скорбей, болезней и томления вражия избавитися, / и от нашествия безбожнаго агарянскаго и междоусобныя брани сохранитися нам / и во Православии всем утвердитися. / Да улучим по милости Божией молитвами твоими / грехов отпущение и присносущных благ наслаждение, / с верою и любовию со умилением присно тебе поющия: / Радуйся, златословесный и кроткий Российский учителю богомудре Кирилле, / покаяния, чистоты и благочестия усердный ревнителю и молитвенниче о спасении душ наших.

Песнь 7

Ирмос: Отроцы в Вавилоне / пещнаго пламене
не убояшася / но, посреде пламене ввержени,
орошаеми, пояху: // благословен еси, Господи
Боже отец наших.

Исполнив служение свое, / прешел еси в жизнь
безконечную, / подвизая всех с тобою взывати:
/ благословен еси, Господи Боже отец наших.

Христолюбцы, ликуйте, / совершающе память
святителя Кирилла, / и в веселии подвизайте
всех пети: / благословен еси, Господи Боже отец
наших.

Отеческаго благочестия ревнителие, / держащи
святаго Кирилла молитвы и каноны, / воспойте
с нами вкупе: / благословен еси, Господи Боже
отец наших.

Богородичен: Уповающи на Тя, Богородице, /
николиже посрамлены суть, / но под кровом
Твоим сохраняеми, / благословляют Твое пред
Богом предстательство.

Ин

Ирмос: В начале землю основавый, и небеса
словом утвердивый, благословен еси во веки,
Господи Боже отец наших.

Уведев непотребное умышление разделить
Церковь Русскую, со дерзновением, отче,
обличил еси слепца и хромца.

Славным и красным мира сего не угождал еси, святителю Кирилле, но Единому Господу со благоговением поработал еси.

Троицы Пресвятыя служителие, Единосущныя и Нераздельныя, николиже посрамятся, ни в сем веце, ни в будущем.

Богородичен: Иерархов похвало, иереев украшение, людей Божиих покрове ширший облака Ты еси, Мати Дево.

Песнь 8

Ирмос: За законы отеческия / блаженнии в Вавилоне юноши предбедствующе, / царюющаго оплеваша повеление безумное / и, совокуплени, имже не сваришася огнем, / Державствующему достойную воспеваху песнь: // Господа пойте дела, и превозносите во вся веки.

Кирилле святителю, / решиши же и вязати от Бога имея власть, / вся разреши грехопадения твою память совершающих, / покаяние теплое приносящих, / к Чаше Безсмертия приступающих, вопиюще во умилении: / Господа пойте дела, и превозносите во вся веки. Радуйся, святейшая Митрополие, / Церковь Белорусская, / яко труба возглашай в день памяти святителя Кирилла, / ибо Господь благослови и умножи тя, / архиереи,

священницы, иноцы / и вся чада твоя ныне
велегласно взывают: / Господа пойте дела, и
превозносите во вся веки.

Ангелы и человецы вкупе / днесь ликуют,
прославляюще святителя Кирилла, / паства
Туровская празднует благоговейно, / яко
христианом подобает, / и хвалу Богови воздает:
/ Господа пойте дела, и превозносите во вся
веки.

Богородичен: Шатанием языческим / и
суемудрием плотским ослеплен, / ум горделивый
не может постигнуть таинство рождества
Твоего, Приснодево, / но чист и смирен
сердцем, / Тя ведая истинную Богородицу,
взывает: / Господа пойте дела, и превозносите
во вся веки.

Ин

Ирмос: На горе святей прославльшася и в
купине огнем Приснодевы Моисеови тайну
явльшаго, Господа пойте и превозносите во вся
веки.

Апостолом подобяся, благовестниче предивный,
изъяснил еси верным во всяком деле и слове
Божественная Писания.

Глаголы богодухновенныя, путеводящая в
Небесное Царствие, проповедал еси праотцем
нашим, первоучителю Кириллу подражая.

Освященный богоносче, миром помазанный
святителю Божий, Троицу во Едином Существо
поеси и превозносиши во вся веки.

Богородичен: Обрадованная, радуйся, с Тобою
Господь, со Архангелом Гавриилом и мы
воспеваем дерзновенно.

Песнь 9

Ирмос: Вечное обретше избавление, / от
праотца Адама свыше рожденное, / роду
страшнаго изречения, / рождество со
безплотными непостижимое славословим, //
Богородицу Тя песнями величающе.

Ежелетняя память твоя, славне, / духовная
весна всем верным явися, / зима греховная
упразднися, / и ликует днесь паства Туровская,
/ якоже цветами, песнями Церковь Христову
украшаючи.

Ныне с нами веселятся / святии мученицы
Борис и Глеб, / и Лаврентий и Мартин
затворницы, и князи Андрей и Борис, / и
священнейшии страдальцы Макарий, Иоанн / и
инии мнозии, вкупе со святителем Кириллом,
Туровския земли светильницы.

Иорданским струям подобящися, / взыграй,
реко Припятье, / ко священному Днепру и горам
Киевским воды своя несущи / и возвращаючи
вспять кресты каменные, / яже и до ныне

землю Туровскую освящают.

Богородичен: Бяже ради прославися земля наша даже и до Киева, / Пречудная Мати Божия, / на кресте Купятицкий образ Свой явившая / и нас грешных милостивно утешающая, / присно хвалебными гласы Тя величаем.

Ин

Ирмос: Проявленное на горе Законоположнику во огни и купине рождество Приснодевы, в наше верных спасение, песнями немолчными величаем.

Покаяния наставниче, молитвенниче преизящный, помолися Христу Богу о почитающих память твою.

Отче Кирилле, Туровский Златоусте, восхваляем тя немолчно, песнями священными величающе.

Юноши и старцы, всяк возраст и сословие, поучаются твоими, святителю, наказаньми и исправленьми.

Богородичен: Слова паче слова рождшая, Пречистая, молися прилежно ко Владыце, в Небеснем Отечестве со святителем Кириллом и нам водворитися.

Светилен:

Светлым учением Богоразумия своего /
просвети, блаженне отче, / всех совершающих
память твою.

Слава.

Подобен: Жены, услышите:

Радуйся, граде Турове наш древнейший, /
славнаго твоего иерарха Кирилла святых мощи
хранящий, / яко той ты по всем концем русским
прослави, / и яко втораго Златоуста его днесь
воспевай песньми.

И ныне, праздника.

На хвалитех стихиры, глас 5:

Радуйся, отрасли благочестия родителей
всечестная, / ты измлада премудрость Божию
возлюбил еси, / забав мирских и богатства
тленнаго отвергся, / обителью Духа Святаго
соделался еси / и храм благодати труды своими
освятил еси, / смирением и чистотою жития
людей града своего удивляя, // всем сердцем
любити Бога и нас научи.

Радуйся, древняго Турова священная главо, /
святителю отче наш Кирилле, / по слову
Писания тесным путем Христу последовав, /
поборник страстей явился еси / и красными
добродетелей своих исправленьми / иноков и
паству свою в послушании наставляя, // моли

даровати мир и единомыслие стаду твоему.
Радуйся, богомудре учителю Церкви Русския, /
ты сиянием Солнца правды просветился, /
оружием слова твоего молитвеннаго тьму
языческую и козни вражия разгнал еси, /
богопроповедуя от волков хищных стадо твое
упасл еси / и вертоград плодоносный из чад
духовных возделал еси / князей от междоусобия
к любви и единению призывая, // в Вере
Православной паству твою утверди.
Радуйся, богоблаженне отче Кирилле, /
покаяния и благочестия ревнителю, / адаманте
чудный и бисере честный, / тело твое святое до
времени сокрыто за грехи наши. / Наветов злых
и напастей отгоняя / и прошения верных
исполняя, // яви милость совершающим память
твою.

Слава, глас 8:

Освященный Божественным Духом / яко
чистый сосуд духовнаго мира благоухание
источаеши всем верным, / прехвальне
святителю наш Кирилле, / земли Белорусския
славо и украшение / моли о всех, любовью
чтущих память твою.

И ныне, праздника.

НА ЛИТУРГИИ

Блаженны от канона 1-го на 8, песни 3-я и 6-я.
Прокимен, глас 4: **Уста моя возглаголют
премудрость и поучение сердца моего
разум. Стих: Хвалите Господа, яко благ
Господь. Апостол ко Евреем, зачало 310.**
Аллилуиа, глас 4: **Блажен муж, бойся
Господа. Стих: Услыши, Боже, глас мой, внегда
молити ми ся к Тебе. Евангелие от Матфея,
зачало 11.**

**[Текст великобденной службы святителю
Кириллу воспроизводится по изданию:
Служба святителю Кириллу, епископу
Туровскому. С приложением акафиста.
Минск: Белорусский Экзархат, 2005. Стр. 3-
23]**

